

Sra. Yolanda Croes

“Yuda nos rescata un generacion y bira un angel sin hala”

ORANJESTAD - ‘Fundacion Scol di Idioma’, un instituto educativo riba tereno di idioma, funda na mei 2001 pa su directora Yolanda Croes, ta acercando compania, bankero y hotelnan local pa ta parti di su Proyecto Social-Cultural pa Muchanan di Bario cu lo start na juli 2009.

E proyecto lo tuma lugar durante henter aña y ta riba un base di ‘non-profit’ [sin fin di ganashi]. E programa aki tin como su obhetivo principal pa inculca den nos hobennan amor pa buki, pa arte y musica, pa naturalesa y con pa cuid’e, guia nan interes pa literatura, eleva nan nivel cultural, siña nan traha cu computer y na mes momento muestra nos hobennan riba e peligronan di internet, kitando nan asina for di caya y aleha nan di peligro pa finalmente yuda forma ciudadanonan recto y fuerte, na mes momento creando un comunidad mas sano.

NOS PROGRAMA

Nos programa ta ensena lesnan di musica, pintamento y handenarbeid, les di computer pa mucha [y pa nos grandinan], lesnan di baile, lesnan di cushinamento y nutricion, les di cuida y planta mata, comedia y drama, contamento di storia y encuentro cu autornan di buki y cu hendenan honorabel for di nos propio comunidad, lesnan di etiqueta y bon manera y con pa anda den diferente situacion y con pa defende nan curpa. Loke ta mas importante ainda yuda nan eleva nan auto-estima, haci nan fuerte pa por enfrenta y reconoce maldad. Ta nos intencion pa restora e norma y balornan di antes cu nos como Arubiano semper a balora y cualnan tristemente ta bayendo perdi dia pa dia mas y mas. Ora bo mira con criminalidad ta incrementando aki na Aruba y con esaki ta afecta nos bida y nos economia siendo un isla cu ta depende di turismo, e ta na beneficio di nos tur y mi ta asta tribi bisa, e ta responsabilidad di cada un di nos como ciudadano preocupa pa yuda desaroya un miho sociedad y cua miho luga pa cuminsa cu no ta cerca nos criaturanan: esnan mas vulnerabel den nos comunidad y nos futuro generacion. Ya caba un generacion henter a cai den perdicion pa falta di guia y negligencia grave di esnan cu tin cu guia e pais aki. No laga mi conta bo, djis

lesa noticianan horibel di gang, ladronicia y atraco cu violencia riba hendenan inocente pa hobennan delincuente riba nos isla chikito cu ya no por yama su mes ‘one happy island’ mas y mi no tin nodo di bisa nada...

Como amigo y conciudadano, mi ta invita bo pa ta parti di mi team cu mi ta yama mi

“Angelnan sin Hala” y yuda rescata un generacion. Bo por haci esaki dor di patronisa of adopta un of mas di nos Projectonan Social-Cultural pa Muchanan di Bario. Nos ta enfoca riba barionan di Pos Chikito, Sabana Basora, Savaneta, Brazil y Sta. Cruz cu ta e barionan mas cerca di mi Scol di Idioma na Pos Chikito. Nos Projectonan Social pa Muchanan di bario ta parti di mi “Huki Buki Club” y “PCH Whizz Kidz”.

Nos sa cu cos no ta pinta mucho elentador pa comercio, ni pa nos hotelnan ultimo tempo, pero tur yudansa den cua forma cu ta, ta altamente aprecia. Nos muchanan ta implora bo generosidad. Aruba y mi persona ta conta cu bo sentimento comunitario, bo amor pa patria y bo curason grandi di semper. Yama nos pa ofrece bo sponsorship na 5944056 of 5842911. Bira un “Angel sin Hala” y yuda salba un isla. No laga palabra falta bo!